

1257 voluit & Pisanos adesse, quorum legatos ex Hetruria, ut quasi arbitri inter utrosque pacisque auctores essent, accersiverat. Fuissetque non multo post Pontificis interventu pax secuta, nisi procul domo tam cito dimicatum esset: cuius rei fama Pontificis & aliorum turbavit consilia. Ubi enim utraque classis in Syriam delata est, Veneti, quam Ptolemaidem valido tenebant præsidio, non propterea Tyrum reliquerant. Hic & Genuenses & Philippus Monfortensis erant, qui omnino hostilia in Venetos vicum ibi incolentes, fuissent ausi, nisi prohibiti a magistratu urbis movere quicquam in urbe aut in portu essent. Erat proinde Venetorum conditio aliquanto melior: quippe qui Ptolemaidem soli haberent, & quæ prius in Tyro quæsita essent, non amississent. Ea re Genuenses adhuc magis accensi, portu repente egressi Ptolemaidem versus ire pergunt. Andreas Zenus & Laurentius Tepulus classis Præfecti, quos nullus hostium motus latere potuit, quum Tyri, ut diximus, multi Veneti nominis pene mixti hostibus essent, rati quod erat, Genuenses ad se venire, ut suo exemplo omnia improvisò adventu turbarent, confestim & ipsi instructas naves portu educunt: atque ita validæ classes sibi obviam factæ, continuo se ad pugnam expediunt: concurritur magnis utrinque viribus, sed majoribus omnino odiis: cruenta inde pugna oritur. Sed res Veneta eo ab initio superior fuit, quo & validior: quippe quæ non parum Pisanorum, quos fœdere per eos dies sibi junxerat, appendicibus esset aucta. Funduntur idcirco fuganturque hostes: eorum naves multæ in altum demersæ, plures captæ, quæ vigintiquinque numero fuisse dicuntur: reliquæ trepida fuga se Tyrum recepere. Venetus victricem classem Ptolemaidem reduxit, quo secum captas naves cum aliquot Genuensium millibus adduxit. Tanta hostium clades non modo non explevit Venetorum iram, sed magis propemodum ac magis efferavit: quippe qui post victoriam ipsam continuo omnia publica & privata illorum ædificia, quæ Ptolemaide erant, diruerunt: horrea mercatorum, præcones, apparitores, & alia pristinae fortunæ vestigia, quæ

*Prospera
Venetorum
pugna inter
Tyrum &
Ptolemai-
da.*